

Lipoti a NAPLAN mo fanau a'oga ta'itasi Fa'amatalaga mo mātua ma tagata e tausia fanau 2023

O le NAPLAN o iloiloga a le atunu'u fa'atatau i tomai tusitusi ma le faitautusi fa'apea malamalama'aga i fainumera ma lo latou fa'aaogaina e faia e fanau a'oga o Tausaga 3, 5, 7 ma le 9. E na o le pau lea o le iloiloga a le atunu'u e fa'atino e fanau uma a Ausitalia. O tomai tusitusi ma le faitautusi fa'apea malamalama'aga i fainumera ma lo latou fa'aaogaina o ni vaega e matuā tāua tele e fa'avae ai a'oa'oga uma fa'apea le manuia o le 'auai ai i fa'atinoga a tagata lautele. O fesili a NAPLAN e iloiloaina ai mataupu e feso'ota'i i mataupu fa'atulagaina a a'oga a Ausitalia i le Iglisi ma le Matematika

O su'ega a NAPLAN e na o se tasi lea o vaega o iloiloga e fa'atino e a'oga ta'itasi fa'apea ma 'aula e faia ai ia lipoti. Talu ai o ia iloiloga e fa'atasi i le ta'i lua tausaga ma fai e fanau a'oga ta'itasi, o lea e le mafai ai e ia iloiloga ona suitulaga i iloiloga lautele faifaiepea ia e faia e faia'oga fa'atatau i fa'atinoga a fanau a'oga. E sili atu le malamalama o le faia'oga a lou alo i le alualu i luma o lona tulaga fa'alea'oa'oga. E fa'atasi ai ma lipoti o isi ituaigā iloiloga, e mafai ona fa'aāoga lipoti a NAPLAN mo fanau a'oga ta'itasi e fa'atalanoa ai ma o latou faia'oga ia tulaga alualu i luma o lou alo.

E fa'apefea ona iloilo e NAPLAN ia fanau a'oga?

O su'ega a NAPLAN e tiliva i luga o le initoneti i a'oga uma i Ausitalia. O iloiloga i luga o le initoneti e tu'uina atu ai fesili e fua lelei i tali a fanau a'oga ta'itasi, ma maua ai ia togi e sili ona sa'o, fa'apea le naunau o fanau a'oga e 'auai i su'ega.

O fesili a NAPLAN e fa'avae tele lava i le poto ma tomai i le tusitusi ma le faitautusi fa'apea malamalama'aga i fainumera ma lo latou fa'aaogaina ia na a'oina e fanau a'oga i tausaga ua mavae i a'oga. E laiti ni fesili e iloiloaina ai mataupu fa'aopopo mai le tausaga lea e fai ai le su'ega, fa'apea ma le tausaga e soso'o ai. O nei fesili na tapenaina ina ia mafai ona taliina i le fa'aaogaina o 'auala na a'oina e fanau a'oga i tausaga ua te'a. O lenei faiga e fa'amautinoaina ai e mafai e fanau a'oga uma pe o le a lava tomai e iai ona fa'aailoa vaega latou te mafai ona fai.

O fa'amatalaga au'ili'ili o le poto ma tomai ia e fuaina e le NAPLAN e maua i le www.nap.edu.au.

O tapula'a fou o tomai

Mai le 2023, na amata fa'aofi ai tapula'a fou i faiga o lipoti a NAPLAN. O lenei faiga ua suitulaga i lipoti fa'a-fuainumera a NAPLAN i taimi ua mavae ia sa fa'atulaga i vaega, ma tapula'a pito i maualalo a le atunu'u. Na malilie Minisita o A'oga, o le 2023 o le taimi sa'o lea e amata fa'aofi ai le suiga lenei fa'atasi ai ma le si'iina o NAPLAN ia Mati.

E maua i tapula'a fou o tomai ia fa'amatalaga manino fa'atatau i tulaga e 'ausia e fanau a'oga. E seti tapula'a nei i tulaga e fa'a-lu'itau 'ae talafeagai, e fua i le tulaga e fa'amoemoeina e mafai e fanau i le taimi o su'ega a NAPLAN, ma matele ona fa'avae i mea na a'oa'oina i tausaga ua mavae i a'oga.

E 4 la'asaga fa'atulagaina o tomai.

- **Sili maoa'e:** O togi a le alo a'oga e mātua sili atu 'ai lo le tulaga na fa'amoemoe e 'ausia i le taimi o le su'ega.
- **Malosi:** O togi a le alo a'oga e 'ausia tulaga lu'itau 'ae e talafeagai ma le tulaga na fa'amoemoe e 'ausia i le taimi o le su'ega.
- **Atia'e:** O togi a le alo a'oga e atagia ai o lo o galulue atu aga'i i tulaga na fa'amoemoe e 'ausia i le taimi o su'ega.
- **Mana'omia fesoasoani fa'aopopo:** O togi a le alo a'oga, e atagia ai latou te le o 'ausia ia taunu'uga fa'a-le-a'oa'oga na fa'amoemoe e 'ausia i le taimi o le su'ega. Latou te ono mana'omia le lagolago fa'aopopo ina ia alualu i luma lo latou taumafai i se tulaga e fa'amalieina.

E le'i suia vaega e iloilo e NAPLAN. O lo o tu'uina atu i le itulau 4 o lipoti a fanau a'oga ta'ito'atasi ia 'oto'otoga o fa'amatalaga au'ili'ili e sili atu, fa'atatau i mea e iloa e fanau a'oga ma e mafai ona fa'atino i totonu o la'asaga ta'itasi o tomai. E maua isi fa'amatalaga i le www.nap.edu.au.

Na fa'apefea ona fili ia la'asaga fa'atulagaina o tomai?

Na fili e ni vaega o faia'oga e iai tomai fa'apitoa ia la'asaga fa'atulagaina o tomai e fa'afeagai ma fa'anaunauta'iga tau a'oa'oga mo vaega o iloiloga ta'itasi fa'apea ma le la'asaga fa'atulagaina fa'a-le-tausaga. Sa iai sao o mātua ma tagata o lo o tausia fanau a'oga i lipoti a fanau a'oga sa tu'uina atu i ni kulupu laiti fa'apitoa ma fa'alapotopotoga a mātua o le atunu'u.

Faitauina o lipoti a NAPLAN

E fa'ailoa i le lipoti a NAPLAN ia le fua o tomai mo iloiloga o vaega ta'itasi (malamalama'aga i fainumera ma lo latou fa'aaogaina, faitautusi, tusitusi, sipela, fa'ailoga faitautusi) fa'atasi ai ma maka o le alo a'oga e fa'ailoa i se togitogi uliuli i luga o le fua.

E fa'aaauu ona fa'ailoa e le lipoti ia tulaga e 'ausia e fanau i le fa'atusatusaina i le ogatotonugālemū o maka a le atunu'u atoa mo lo latou tausaga (e fa'aalia o se tafatolu uliuli) fa'apea ma le va 'ese'ese o tulaga e 'ausia e le vaega ogatotonu o le 60% o fanau a'oga i le la'asaga fa'atulagaina o le latou tausaga (e fa'ailoaina o se pusa fa'atafafā lanu vaivai).

O le NAPLAN o se meafaigaluega taua e maua ai malamalama'aga aogā i fa'atinoga a fanau a'oga, 'ae e tatau ona fa'aetete i le fa'auigaina o lipoti ta'itasi ona e atagia i lipoti fa'atinoga a fanau a'oga i le aso o le su'ega.

E fa'apefea pe a fai mai le lipoti a lo'u alo na latou faia a latou su'ega i luga o pepa.

E ui o NAPLAN o su'ega e faia i luga o le initoneti, e iai nai tulaga laititi e ono faia ai su'ega a fanau a'oga i luga o pepa. E aofia i ia tulaga pe a:

- fa'aaoga e a'oga seisi 'auala fa'a-le-a'oa'oga e mana'iaina
- mana'omia e fanau a'oga ia su'ega e fai i luga o pepa ona o mafua'aga mo le maua o avanoa
- iai ni fa'afitauli e tula'i mai i le taimi o su'ega e mana'omia ai le fa'aaogaina o pepa i tulaga fa'aleoleo.

O fanau a'oga o le Tausaga 3 e fa'atino atoa a latou su'ega tusitusi i luga o pepa.

E mafai ona fa'atusatusa le fa'atinoga a lo'u alo i lipoti muamua a NAPLAN?

E le mafai ona fa'atusatusa sa'o ia togi mai le 2023 ma le aga'i i luma, i togi mai le 2008 e o'o i le 2022. O le mafua'aga ona o le fua fou e sili atu ona fetāui mo su'ega e fai i luga o le initoneti lea ua amata fa'aaoga fa'atasi ai ma tapula'a fou.

E le gata i lea, ae i le 2023 ua se'e atu ai su'ega i le kuata muamua (Term 1) mai le kuata lua (Term 2). E ui i lea, e pei o tausaga ua mavae, e fa'aaauu pea ona mafai ona e va'ai i tulaga o lo'o 'ausia e lou alo i le fa'atusatusaina lea i le ogatotonugālemū o maka a le atunu'u atoa mo le tausaga.

E fa'apefea ona fesoasoani NAPLAN i lo'u alo?

E fa'ataga e NAPLAN ia mātua ma tagata e tausia fanau a'oga e va'ai pe o fa'apefea fa'atinoga a o latou alo i le tusitusi ma le faitautusi fa'apea malamalama'aga i fainumera ma lo latou fa'aaogaina e fua i tapula'a mo le atunu'u atoa. E mafai ona fa'atusatusa tulaga e 'ausia e lou alo i le ogatotonugālemū o maka a le atunu'u atoa i le tausaga lava e tasi fa'apea la'asaga 'ese'ese o tomai.

E mafai ona fesoasoani ia togi i mātua ma tagata e tausia fanau fa'apea fo'i fanau a'oga i le fa'atalanoaina ma faia'oga le alualu i luma a fanau a'oga ta'itasi.

O le a le a'afiaga o togi i le lumana'i o lo'u alo?

O togi a NAPLAN e maua ai fa'amatalaga taua fa'atatau i tomai tusitusi ma le faitautusi fa'apea malamalama'aga i fainumera ma lo latou fa'aaogaina ia e a'oa'oina e lou alo i mataupu fa'atulagaina a le latou a'oga. O togi e lagolago i isi iloiloga e fa'atino e lou alo i le a'oga, ma maua atu ai mo 'oe ma le faia'oga a lou alo se malamalama'aga i tulaga e 'ausia e lou alo i le taimi o su'ega. E mafai ona fa'aaoga ia fa'amatalaga e lagolagoina ai lou alo ina ia latou 'ausia le atoatoaga o le mafai latou te gafatia.

E ono fesili atu nisi o a'oga mo lipoti a NAPLAN, e fa'aopopo i lipoti a'oga, 'auā se vaega o a latou fa'atinoga mo le taliaina o fanau a'oga fou. E le'i fuafuina le NAPLAN e fai ma su'ega e fa'a'ulufale ai fanau a'oga fou; peita'i, e ono aogā togi e iloa ai e le a'oga fou ia mana'oga fa'a-le-a'oa'oga a le alo a'oga.

E fa'apefea ona fesoasoani NAPLAN i le a'oga a lo'u alo?

O le NAPLAN e na o le pau lea o le iloiloga a le atunu'u e fa'atino e fanau uma a Ausitalia. E fesoasoani:

- i faia'oga ina ia lelei atili ona maua po o ai fanau a'oga e mana'omia lu'i e sili atu po o fesoasoani fa'aopopo
- i a'oga ina ia maua vaega o porokalame o a'oa'oga e malolosi ma vaega e iai mana'oga
- i a'oga mo le fa'atulagaina o sini mo tomai tusitusi ma le faitautusi fa'apea malamalama'aga i fainumera ma lo latou fa'aaogaina
- i 'auala fa'atino a a'oga mo le iloilo ina o porokalame ma fesoasoani e ofoina i a'oga.

E maua atu fo'i i le NAPLAN ia fa'amaumauga tu'ufa'afeagi a le atunu'u e fesoasoani i mālo e iloilo ai pe o fa'apefea le galuea'iga o porokalame mo a'oa'oga ma po o 'ausia e fanau a'oga ia tapula'a taua o tomai tusitusi ma le faitautusi fa'apea malamalama'aga i fainumera ma lo latou fa'aaogaina.

O ai isi e va'ai i togi?

I tausaga ta'itasi, e tu'uina atu e pulega fa'atino o su'ega i a'oga ia togi a fanau a'oga uma e su'e i le NAPLAN. E una'ia a'oga e fa'a'oa'oga ia togi e fuafua ai ia vaega e fa'alelei atili mo le a'oga atoa.

E malu puipuia lipoti a fanau a'oga ta'itasi mai i le fa'ailoaina fa'alaua'itele. E leai seisi, vagana ai pulega o fa'atinoga o su'ega a lo outou alaafaga fa'apea le 'aufaigaluega a le a'oga a lou alo, e vā'ai i le lipoti a lou alo

E lipotia fa'alaua'itele ia le ogatotonugālemū o maka a a'oga i luga o le

My School i le www.myschool.edu.au. O le uepisaite e fa'afouina i togi o tausaga taitasi i le aga'i atu i le fa'ai'uga o le tausaga. O togi a lou lava alo e le maua i luga o le My School.